

Na osnovu člana 66. stav 1. i člana 68. stav 1. i 2. Zakona o vodama („Službene novine Federacije BiH”, broj 70/06), člana 42. stav 2. Zakona o vodama Kantona Sarajevo ("Službene novine Kantona Sarajevo", broj: 18/10), člana 13. stav 1. Pravilnika o načinu utvrđivanja uslova za određivanje zona sanitarne zaštite i zaštitnih mjera za izvorišta vode za javno vodosnabdijevanje stanovništva ("Službene novine Federacije BiH", broj: 88/12), člana 24. Statuta Općine Hadžići („Službene novine Kantona Sarajevo“, broj: 15/09, 17/12, 10/13, 14/13 – ispravka, 11/18 i 1/20) i člana 88. Poslovnika Općinskog vijeća Hadžići („Službene novine Kantona Sarajevo“ broj: 7/18), Općinsko vijeće na 4. sjednici, održanoj dana, 06.01.2025. godine, d o n o s i

ODLUKU O ZAŠTITI IZVORIŠTA VODE ZA PIĆE „KOŠĆAN“

DIO PRVI - OPĆE ODREDBE

Član 1.

(Predmet Odluke)

Ovom odlukom, u skladu sa Pravilnikom o načinu utvrđivanja uslova za određivanje zona sanitarne zaštite i zaštitnih mjera za izvorišta vode za javno vodosnabdijevanje stanovništva („Službene novine Federacije BiH”, broj: 88/12), utvrđuju se, zone sanitarne zaštite za izvorište „Koščan“, općina Hadžići, koje se koristi za snabdijevanje vodom potrošača u naselju Koščan, te veličine i granice zona sanitarne zaštite, zaštitne mjere, režimi zaštite, nadzor nad provođenjem ove Odluke, kao i druga pitanja od značaja za provođenje sanitarne zaštite, te očuvanja izdašnosti izvorišta voda za piće.

Član 2.

(Razlozi za donošenje Odluke)

- (1) Ova Odluka se donosi u cilju zaštite izvorišta „Koščan“ na teritoriji općine Hadžići od svih vidova zagađenja i štetnih uticaja koji mogu nepovoljno djelovati na zdravstvenu ispravnost vode za piće ili na izdašnost izvorišta.
- (2) Ovom Odlukom utvrđuje se zaštita Izvorišta uspostavljanjem i održavanjem zona sanitarne zaštite i zaštitnih mjera, utvrđenih u skladu sa lokalnim uslovima, na osnovu provedenih istražnih radova, analiza i stručnog elaborata za zone sanitarne zaštite na području Općine Hadžići, a u cilju zaštite izvorišta iz kojeg se vrši eksploatacija vode za potrebe vodosnabdijevanja stanovništva na području naselja Koščan.

Član 3.

(Izvorište)

- (1) Izvorište označava uži prostor gdje se iz vodnog tijela podzemnih voda ili iz vodnog tijela površinskih voda zahvata ili se planira zahvatati voda za ljudsku upotrebu.
- (2) Sliv Izvorišta „Koščan“ proteže se na teritoriji općine Hadžići.

DIO DRUGI - ZONE SANITARNE ZAŠTITE I ZAŠTITNE MJERE

Član 4.

(Vrsta izvorišta)

U skladu sa članom 7. Pravilnika o načinu utvrđivanja uslova za određenje zona sanitarne zaštite i zaštitnih mjera za izvorišta vode za javno vodosnabdijevanje stanovništva („Službene novine FBiH“ broj: 88/12) (u daljem tekstu: Pravilnika), Izvorište „Koščan“ predstavlja izvorište vode u kraškim akviferima.

Član 5.

(Uspostavljanje zone zaštite)

Za izvorište „Koščan“, utvrđuju se sljedeće zone sanitarne zaštite:

I zona – zona sa najstrožijim zabranama i ograničenjima (zona izvorišta);

II zona – zona sa strogim zabranama i ograničenjima.

DIO TREĆI - OBUHVAT I GRANICE ZAŠTITNIH ZONA

POGLAVLJE I – I ZONA – ZONA SA NAJSTROŽIJIM ZABRANAMA I OGRANIČENJIMA (ZONA IZVORIŠTA)

Član 6.

(Obuhvat i granice I zaštitne zone)

- (1) Područje I zaštitne zone izvorišta obuhvata neposredni prostor oko navedenih vodozahvatnih objekata (kaptaža), kojim se vodozahvatni objekti štite od slučajnog ili namjernog zagađenja ili oštećenja. Površina I zaštitne zone oko vodozahvatnih objekata je obuhvatila već ograđeni prostor unutar kojih se nalaze vodozahvatni objekti Krč 1 i Krč 2, Bijele vode i rezervoar Koščan.
- (2) Granica I zaštitne zone određena je u skladu sa članom 7. stav 2. i 3. Pravilnika u kome je propisano da se granica I zaštitne zone može smanjiti na udaljenost ne manju od deset (10) metara, od vanjskih kontura vodozahvatnog područja.
- (3) Ukupna površina I zaštitne zone iznosi za izvorište Koščan iznosi 0,031 ha.
- (4) Općina Hadžići će u skladu sa važećim propisima o eksproprijaciji regulisati pitanje imovinskopravnih odnosa sa sadašnjim vlasnicima zemljišta na području I zaštitne zone.

Član 7.

(Objekti na području I zaštitne zone)

- (1) Na području I zaštitne zone izvorišta vode za piće „Koščan“ postoje 3 kaptaže, odakle se voda odvodi u rezervoar, te ograde sa ulaznim kapijama.
- (2) Pored postojećih objekata, iz stava 1. ovog člana, na području I zaštitne zone, mogu se, uz primjenu propisanih mjera zaštite u skladu sa Pravilnikom nalaziti i drugi vodoprivredni objekti, kao što su vodozahvatni objekti, postrojenje za prečišćavanje, rezervoari, pumpne stanice, trafo-stanice, administrativni objekti, kao i infrastrukturni i drugi objekti koji se koriste u svrhu obezbjeđenja javnog vodosnabdijevanja.

Član 8.

(Upravljanje objektima i provođenje mjera na području I zaštitne zone)

- (1) Vodnim i drugim objektima iz člana 7. ove Odluke koji služe za vodosnabdijevanje naselja Koščan, upravlja Javno komunalno preduzeće “Komunalac” d.o.o. Hadžići.
- (2) Javno komunalno preduzeće “Komunalac” d.o.o. Hadžići nadležno je za provođenje svih zaštitnih mjera propisanih ovom Odlukom na području I zaštitne zone.

Član 9.

(Zaštita, pristup i obilježavanje)

- (1) Područje I zaštitne zone mora biti zaštićeno od neovlaštenog pristupa ogradom, kao i drugim potrebnim mjerama osiguranja uz stalni elektronski i/ili fizički nadzor.
- (2) Ograda iz prethodnog stava ovoga člana mora biti izvedena na način da spriječi neovlašteni ili nasilni ulazak na područje I zaštitne zone.
- (3) Javno komunalno preduzeće "Komunalac" d.o.o. Hadžići je obavezno ograditi područje I zaštitne zone, na odgovarajući način obilježiti zaštitnu zonu, što naročito uključuje naziv izvorišta i zaštitne zone, naziv preduzeća, broj dežurnog telefona za hitne slučajeve i upozorenje o zabrani neovlaštenog pristupa.
- (4) Pristup na područje I zaštitne zone dozvoljen je samo ovlaštenim osobama, što uključuje zaposlenike Javnog komunalnog preduzeća "Komunalac" d.o.o. Hadžići koji stalno ili povremeno rade na objektima unutar ove zone i nadležnim inspekcijским organima u toku vršenja redovnih ili vanrednih kontrola ove zone, kao i drugim licima uz posebno odobrenje i evidenciju Javnog komunalnog preduzeća "Komunalac" d.o.o. Hadžići, što se precizira općim aktom o održavanju i korištenju vodnih objekata iz člana 20. stav 4. Zakona o vodama Federacije BiH.
- (5) Sva lica iz prethodnog stava ovoga člana moraju posjedovati odgovarajuće propusnice kako bi mogla pristupiti prostoru I zaštitne zone. Vrste propusnica i uslovi njihovog izdavanja utvrđuju su općim aktom Javnog komunalnog preduzeća "Komunalac" d.o.o. Hadžići iz prethodnog stava.
- (6) Lica koja stalno ili povremeno rade na objektima vodozahvata unutar I zaštitne zone moraju biti podvrgnuta periodičnim liječničkim pregledima, u skladu sa odgovarajućim propisima o sanitarnoj zaštiti.

Član 10.

(Aktivnosti na području I zaštitne zone)

- (1) Na području I zaštitne zone izvorišta, zabranjuju se sve aktivnosti koje nisu u direktnoj vezi sa normalnim radom i održavanjem vodozahvatnih objekata. Aktivnosti koje se provode u cilju normalnog rada i održavanja vodozahvatnih objekata ne smiju štetno djelovati na Izvorište.
- (2) Izuzetno od odredaba stava 1. ovoga člana, dozvoljavaju se, a u skladu sa Prilogom 1. Pravilnika, sljedeće aktivnosti uz standardne mjere zaštite:
 - Izgradnja kanalizacije i drugih infrastrukturnih instalacija koje omogućuju redovno funkcionisanje objekata vodozahvatnog područja;
 - Prirodni uzgoj trave, pri čemu nije dozvoljena upotreba đubriva i drugih agrotehničkih sredstava.

POGLAVLJE II - II ZAŠTITNA ZONA (ZONA SA STROGIM ZABRANAMA I OGRANIČENJIMA)

Član 11.

(Obuhvat i granice II zaštitne zone)

- (1) Uspostavlja se II zaštitna zona području izvorišta „Koščan“.
- (2) Granica II zaštitne zone izvorišta „Koščan“ obuhvata prostor od vanjske granice I zaštitne zone do linije od koje je podzemnoj vodi potrebno najmanje jedan (1) dan tečenja do vodozahvata, sukladno članu 7. stav 6. Pravilnika.
- (3) Površina II zaštitne zone na području izvorišta „Koščan“ iznosi 7,6 ha.
- (4) Područje II zaštitne zone za izvorišta „Koščan“ obuhvata prostor od vanjske granice I zaštitne zone do vanjske granice II zaštitne zone, koja se proteže od granice prve zaštitne zone na izvorištu Krč 1 i Krč 2 duž granice hidrogeološkog sliva u pravcu istoka u dužini od cca 110 m do kote 900 m n.m., potom vodi u pravcu jugozapada duž hidrogeološkog sliva u dužini oko 550 m do kote 1.008 m.n.m na M.Pandurice, te sjeverozapadno u dužini cca 70 m do 995

m.n.m. i nastavlja dalje sjeverno u dužini cca 250 m do kote 860 m.n.m. Nastavlja se istočno do granice prve zaštitne zone izvora Bijele vode i nastavlja dalje u dužini od oko 70 m do kote 971 m.n.m., nastavlja dalje jugoistočno do kote 989 m.n.m. odakle se dalje pruža sjeveroistočno u dužini od cca 330 m do kote 912 m.n.m, odakle ide istočno do granice I zaštitne zone izvora Krč 1 i Krč 2.

Član 12.

(Aktivnosti na području II zaštitne zone)

(1) Na području II zaštitne zone Izvorišta za sve aktivnosti, propisuju se nivoi ograničenja i zabrane za II zaštitnu zonu, a u skladu sa Prilogom 1. Pravilnika.

Zabranjuje se:

- Izgradnja novih urbanih naselja;
- Proširenje postojećih urbanih naselja;
- Individualna stambena izgradnja uz korištenje samostalnih sistema za tretman otpadnih voda (npr. septičke jame);
- Izvođenje ili obavljanje bilo kakvih aktivnosti koje izazivaju ili pospješuju eroziju tla;
- Iskopi u vodonosnom sloju;
- Vađenje materijala iz vodotoka;
- Izgradnja i rad kamenoloma i drugih pozajmišta materijala;
- Minerski i drugi građevinski radovi koji nisu u funkciji vodosnabdijevanja, a koji mogu poremetiti kompoziciju vodonosnih slojeva;
- Izvođenje istražnih radova za, mineralne vode, kao i druge materije koje mogu ugroziti kvalitet vode na izvorištu;
- Transformatorske stanice;
- Manevarski i vojni poligoni;
- Izgradnja novih, korištenje ili proširenje postojećih groblja;
- Ispuštanje nepročišćenih urbanih otpadnih voda;
- Izgradnja i rad postrojenja za tretman urbanih otpadnih voda;
- Odlaganje bilo kakvog čvrstog, građevinskog, komunalnog i drugog otpada;
- Izgradnja i rad sanitarnih deponija;
- Izgradnja i rad postrojenja za tretman mulja u sastavu postrojenja za tretman otpadnih voda;
- Izgradnja i rad postrojenja za tretman životinjskog otpada;
- Podzemna eksploatacija mineralnih sirovina, izgradnja i rad objekata za deponovanje, mljevenje i preradu sirovina i jalovine;
- Površinska eksploatacija mineralnih sirovina, izgradnja i rad objekata za deponovanje, mljevenje i preradu sirovina i jalovine;
- Izvođenje istražnih i eksploatacionih bušotina za naftu i zemni gas;
- Izvođenje istražnih radova i eksploatacija radioaktivnih tvari;
- Pogoni metalne industrije;
- Pogoni hemijske industrije,
- Pogoni gumarske industrije;
- Pogoni industrije papira i celuloze;
- Pogoni kožarske industrije;
- Pogoni prehrambene industrije;
- Gasne elektrane;
- Termo elektrane;
- Nuklearne elektrane;
- Skladištenje svih industrijskih sirovina i hemikalija opasnih za vodu;
- Skladištenje i deponovanje radio-aktivnih tvari i otpada;
- Skladištenje i deponovanje šljake i pepela;
- Deponije industrijskog otpada opasnog za kvalitete vode na izvorištu;

- Izgradnja i rad industrijskih kanalizacionih sistema;
- Izgradnja i rad postrojenja za tretman industrijskih otpadnih voda;
- Ispuštanje ili akumuliranje neprečišćenih industrijskih otpadnih i rashladnih voda;
- Izgradnja autocesta i cesta rezervisanih za motorni saobraćaj;
- Izgradnja depoa za teška vozila;
- Izgradnja i rad autobusnih stanica i terminala;
- Izgradnja željezničkih pruga, ranžiranih stanica i terminala;
- Izgradnja i rad aerodroma ili poletno –sletnih staza za korištenje u zračnom saobraćaju;
- Izgradnja i rad cjevovoda za transport tekućina opasnih za kvalitet vode;
- Cestovni transport hemikalija, tečnih goriva i drugih opasnih materija;
- Izgradnja nadzemnih ili podzemnih spremnika;
- Izgradnja pretakališta;
- Izgradnja benzinskih stanica uz prometnice;
- Skladištenje ograničenih količina lož ulja ili pogonskog goriva za poljoprivredne strojeve za potrebe individualnih domaćinstava;
- Intenzivna stočarska i peradarska proizvodnja;
- Deponovanje čvrstog ili tečnog stajnjaka za pojedinačna domaćinstva;
- Intenzivna ispaša stoke;
- Napajanje stoke iz površinskih vodotoka;
- Skladištenje đubriva i pesticida;
- Poljoprivredna proizvodnja praćena intenzivnim korištenjem vještačkih đubriva, stajnjaka, pesticida, herbicida i insekticida;
- Navodnjavanje prečišćenim otpadnim vodama;
- Nekontrolisana sječa i krčenje šume;
- Korištenje plovnih sredstava sa motorima sa unutrašnjim sagorijevanjem.

Uz standardne i dodatne mjere zaštite dozvoljeno je:

- Održavanje postojećih građevinskih objekata bez promjene namjene;
- Izgradnja urbanih prometnica i pripadajućih objekata (parkirališta, mostova, tunela,...);
- Stočarska i peradarska proizvodnja za vlastite potrebe pojedinačnih domaćinstava, do 10 grla krupne stoke;
- Izgradnja i rad sportsko-rekreacionih i banjsko-lječilišnih objekata;
- Kampovanje ili drugi vid organizovanog okupljanja ljudi u prirodi;
- Izgradnja i rad otvorenih sportskih terena;
- Izgradnja i rad igrališta za golf;
- Izgradnja i rad skijališta.

Uz standardne mjere zaštite dozvoljeno je:

- Deponije industrijskog otpada bezopasnog za kvalitete vode na izvorištu;
- Poljoprivredna proizvodnja zdrave hrane bez korištenja vještačkih đubriva, stajnjaka, pesticida, herbicida i insekticida;
- Prirodni uzgoj trave bez upotrebe đubriva i drugih agrotehničkih sredstava;
- Kontrolisana sječa i krčenje šume;
- Turističke aktivnosti (splavarenje, rafting, ...);
- Rekreacioni i sportski ribolov.

(2) Za sve ostale aktivnosti zabrane i nivo ograničenja njihove primjene važe u skladu sa Prilogom 1. Pravilnika.

DIO ČETVRTI - NAZIV ORGANA I PRAVNIH LICA NADLEŽNIH ZA SPROVOĐENJE ODLUKE I MJERE ZAŠTITE

Član 13.

(Nadležni organi)

Organi nadležni za provođenje ove Odluke su Općina Hadžići i to u skladu članom 6. stav 4. i Javno komunalno preduzeće "Komunalac" d.o.o. Hadžići u skladu sa članom 8. stav 1. i 2., te, članom 9. stav 3., 4. i 5. ove Odluke.

Član 14.

(Provođenje mjera zaštite u I zaštitnoj zoni)

Aktivnosti na provođenju mjera zaštite u I zaštitnoj zoni Izvorišta „Koščan“ provoditi će Javno komunalno preduzeće "Komunalac" d.o.o. Hadžići.

Član 15.

(Monitoring)

Monitoring kvantiteta i kvaliteta vode na izvorištu unutar I zona sanitarne zaštite izvorišta „Koščan“ provoditi će Javno komunalno preduzeće "Komunalac" d.o.o. Hadžići, te na taj način osigurati stalni i sistematski pregled vode, te poduzimati mjere za osiguranje zdravstvene ispravnosti vode za piće.

DIO PETI - IZVORI I NAČIN FINANSIRANJA I NADZOR NAD PROVOĐENJEM ODLUKE

Član 16.

(Finansiranje provođenja mjera zaštite)

Finansiranje provođenja mjera zaštite u I zaštitnoj zoni izvorišta „Koščan“ u Hadžićima vršiti će Operator vodovodnog sistema, odnosno Javno komunalno preduzeće "Komunalac" d.o.o. Hadžići.

Član 17.

(Nadzor)

- (1) Upravni nadzor nad provođenjem ove Odluke vrši nadležni organ Kantona Sarajevo i Općine Hadžići.
- (2) Inspeksijski nadzor nad provođenjem ove Odluke odnosno nad provođenjem režima i mjera zaštite propisanih ovom Odlukom vrše kantonalni i općinski inspeksijski organi u skladu sa važećim zakonskim propisima.

DIO ŠESTI - KAZNENE ODREDBE

Član 18.

(Novčane kazne za prekršaj po Odluci)

- (1) Novčanom kaznom od 1.000 do 5.000 KM kaznit će se za prekršaj pravno lice:
 - ako vrši izvođenje radova, izgradnju ili rekonstrukciju objekata ili obavlja aktivnosti protivno zaštitnim mjerama propisanim ovom Odlukom;
 - ako ne postupi u skladu sa članom 12. i 14. ove Odluke.
- (2) Za prekršaj iz stava 1. ovoga člana kaznit će se i odgovorno lice u pravnom licu novčanom kaznom u iznosu od 100 do 1.000 KM.

Član 19.

(Kazne za privredni prestup)

Pravno i odgovorno lice u pravnom licu kaznit će se za privredni prestup iz člana 204. stav 1.,

tačka 10. i član 206. stav 1., tačka 15., Zakona o vodama FBiH („Službene novine Federacije BiH“ broj: 70/06).

Član 20.

(Novčane kazne za fizičko lice)

Novčanom kaznom od 100 do 500 KM kazniće se za prekršaj fizičko lice: ako vrši izvođenje radova, izgradnju ili rekonstrukciju objekata ili obavlja aktivnosti protivno zaštitnim mjerama propisanim ovom Odlukom.

DIO SEDMI - PRELAZNE I ZAVRŠNE ODREDBE

Član 21.

(Obavljanje djelatnosti i mjere zaštite)

- (1) Urbanističko uređenje prostora, građenje, privredne, poljoprivredne i druge djelatnosti mogu se vršiti samo na način i u mjeri koji su utvrđeni ovom Odlukom.
- (2) Privredna društva, federalni, kantonalni i općinski organi uprave, druga pravna lica i građani dužni su pridržavati se odredbi ove Odluke i primjenjivati propisane mjere zaštite.

Član 22.

(Grafički prilog)

Sastavni dio ove Odluke je grafički prilog na kome su prikazane granice zona sanitarne zaštite izvorišta.

Član 23.

(Uređenje prostora)

Na područjima I zaštitne zone izvršit će se uređenje prostora i provođenje zaštitnih mjera u skladu sa ovom Odlukom i projektom zaštite u roku od dvije godine od dana njenog stupanja na snagu.

Član 24.

(Provođenje radnji i primjena Odluke)

- (1) Općina Hadžići dužna je izvršiti radnje iz člana 6. stav 4. ove Odluke u roku od šest mjeseci od dana njenog stupanja na snagu.
- (2) Javno komunalno preduzeće “Komunalac” d.o.o. Hadžići, dužno je izvršiti radnje iz člana 8. i 9. ove Odluke u roku od šest mjeseci od dana njenog stupanja na snagu.
- (3) Javno komunalno preduzeće “Komunalac” d.o.o. Hadžići i druga pravna i fizička lica, dužni su pridržavati se odredaba ove Odluke i primjenjivati iste.

Član 25.

(Obaveza usklađivanja sa odredbama Odluke)

Donosioci planskih dokumenata (prostorni plan, planovi upravljanja vodama, šumskoprivredna osnova) dužni su iste uskladiti sa odredbama ove Odluke u roku od 6 mjeseci od dana njenog stupanja na snagu.

Član 26.

(Stupanje na snagu)

Ova Odluka stupa na snagu osmog dana od dana objavljivanja u “Službenim novinama Kantona Sarajevo”.

Broj: 01-02-482/2025
Hadžići, 06.01.2025. godine

Predsjedavajući
Općinskog vijeća Hadžići

Dženan Rizvo